

**"ТАСДИҚЛАНГАН"**  
**"O'zenergositish" АЖ**  
**Ягона акциядорининг**  
**2024 йил 29 ноябрдаги**  
**9-сонли қарори билан**

**"O'ZENERGOSITISH" АКЦИЯДОРЛИК ЖАМИЯТИ ТОМОНИДАН**  
**ҲОМИЙЛИК ВА БЕҒАРАЗ ЁРДАМ КЎРСАТИШ ТЎҒРИСИДАГИ**  
**НИЗОМ**

**Тошкент – 2024 йил**

## МУНДАРИЖА

I.	УМУМИЙ ҚОИДАЛАР.....	3
II	ҲОМИЙЛИК ВА БЕҒАРАЗ ЁРДАМ КЎРСАТИШ МИҚДОРИ ВА ЙЎНАЛИШИ (САРФЛАНИШИ).....	4
III	ҲОМИЙЛИК ВА БЕҒАРАЗ ЁРДАМ КЎРСАТИШ УЧУН АРИЗАЛАРНИ КЎРИБ ЧИҚИШ ТАРТИБИ.....	4
IV	ЯКУНИЙ ҚОИДАЛАР.....	4

## I. УМУМИЙ ҚОИДАЛАР

1. "O'zenergosotish" акциядорлик жамиятининг (кейинги ўринларда – Жамият) “Ҳомийлик ва беғараз ёрдам кўрсатиш тартиби тўғрисида”ги низоми (кейинги ўринларда Низом) Жамият томонидан амалга ошириладиган ҳомийлик ва беғараз ёрдам кўрсатиш тартиби ва тамойллари белгилайди.

2. Ушбу Низомда қуйидаги атамалар қўлланилади:

Беғараз (хайрия) ёрдам – Жамият томонидан жисмоний ва юридик шахсларга беғараз ёки имтиёзли шартларда пул маблағини ўтказиш (бериш), бепул хизматлар кўрсатиш ва ишларни бажариш ёки бошқа йўл билан қўллаш.

Ҳомийлик қилиш – Жамият томонидан ҳомийлик қилинаётган шахснинг ҳисоб рақамига маблағ (шу жумладан мулк шаклида) ажратиш ва Жамият тўғрисидаги рекламани жойлаштириш (тарқатиш) шарти билан хизматлар кўрсатиш.

3. Жамиятнинг ёрдам миқдорига қараб ҳомийлик ва беғараз ёрдам кўрсатиш бўйича ваколатли органи бўлиб Акциядорларнинг умумий йиғилиши, Кузатув кенгаши, ижро органи ҳисобланади.

4. Жамиятнинг ҳомийлик ва беғараз ёрдам кўрсатиш бўйича ваколатли органи, ўз ваколати доирасида қуйидаги миқдордаги ҳомийлик ва беғараз ёрдам кўрсатиш тўғрисида қарор қабул қилиш ҳуқуқига эга:

- Жамият Ижро этувчи орган умумий миқдори Ўзбекистон Республикасида Базавий ҳисоблаш миқдорининг (БҲМ) 1 000 баробаригача бўлган, лекин Жамиятнинг олдинги ҳисобот йили натижалари бўйича олинган соф фойдасининг 3 фоизидан ошмайдиган суммалар бўйича ҳомийлик ва беғараз ёрдам кўрсатиш тўғрисида қарор қабул қилиш ваколатига эга;

- Жамият Кузатув кенгаши Ўзбекистон Республикасида Базавий ҳисоблаш миқдорининг 1 000 баробаридан 10 000 баробаригача бўлган, лекин Жамиятнинг олдинги ҳисобот йили натижалари бўйича олинган соф фойдасининг 3 фоизидан ошмайдиган суммалар бўйича ҳомийлик ва беғараз ёрдам кўрсатиш тўғрисида қарор қабул қилиш ваколатига эга;

- Жамият акциядорларнинг умумий йиғилиши (ягона акциядори) Ўзбекистон Республикасида Базавий ҳисоблаш миқдорининг 10 000 баробаридан кўп бўлган, лекин Жамиятнинг олдинги ҳисобот йили натижалари бўйича олинган соф фойдасининг 3 фоизидан ошмайдиган суммалар бўйича ҳомийлик ва беғараз ёрдам кўрсатиш тўғрисида қарор қабул қилиш ваколатига эга.

5. Жамият томонидан ҳомийлик ва беғараз ёрдам кўрсатиш Жамият Бизнес-режасининг ўтган ҳисобот давридаги соф фойдага тааллуқли қисми кўрсаткичлари бажарилган тақдирдагина амалга оширилади.

6. Ҳар қандай юридик ва жисмоний шахс ҳомийлик ёки беғараз ёрдам кўрсатиш тўғрисида Жамиятга мурожаат қилишга ҳақли.

## **II. ҲОМИЙЛИК ВА БЕҒАРАЗ ЁРДАМ МИҚДОРИ ВА ЙЎНАЛИШИ**

7. Бир йил давомида кўрсатилган ҳомийлик ва беғараз ёрдамнинг умумий миқдори Жамиятнинг ўтган ҳисобот йилидаги натижалари бўйича олинган соф фойдасининг 3 фоизидан ошиб кетишига йўл қўйилмайди.

8. Хар йили ажратиладиган ҳомийлик ва беғараз ёрдамнинг йўналишлари Жамиятнинг Бизнес режасида кўрсатилади.

9. Бизнес режада белгиланган доирада ва ушбу Низомнинг 4-бандида кўрсатилган миқдорда ёрдам кўрсатиш тўғрисидаги қарорлар Жамиятнинг тегишли ваколатли бошқарув органи томонидан қабул қилинади.

10. Ҳомийлик ва беғараз ёрдамнинг умумий суммаси Жамият Бизнес режасида акс эттирилган қийматдан ошса, ошган сумма бўйича қарорлар миқдорига қараб Жамиятнинг Кузатув кенгаши ёки Ягона акциядори томонидан қабул қилинади.

## **III. ҲОМИЙЛИК ВА БЕҒАРАЗ ЁРДАМ КЎРСАТИШ УЧУН АРИЗАЛАРНИ КЎРИБ ЧИҚИШ ТАРТИБИ**

11. Ҳомийлик ва/ёки беғараз ёрдам кўрсатиш бўйича қилинган мурожаат Жамиятга юридик ва жисмоний шахслардан почта орқали, электрон алоқа воситалари орқали ёки аризани Жамият девонхонасига шахсан тақдим қилиш йўли билан қабул қилинади.

12. Қабул қилинган аризалар рўйхата олингандан кейин Жамият ижро органи раҳбариятига кўриб чиқиш учун киритилади.

13. Ижро органи раҳбари келиб тушган мурожаатларни белгиланган тартибда кўриб чиқиш учун Бошқарув аъзолари мажлисини чақиради.

14. Бундай мурожаат ва аризаларни кўриб чиқиш учун Жамият ижро органи мажлисининг кворуми камида 75 фоиз бўлиши керак.

15. Ижро этувчи орган коллегиял тартибда ҳомийлик ва беғараз ёрдам кўрсатиш ёки кўрсатишни рад этиш тўғрисида қарорларни қабул қилади. Ҳар бир масала бўйича қарор мажлисда қатнашган барча аъзолар томонидан бир овоздан қабул қилиниши керак.

16. Ҳомийлик ва беғараз ёрдам кўрсатиш бўйича қилинган мурожаат суммалари юзасидан қарорлар қабул қилиш Жамият Кузатув кенгаши ёки ягона акциядори ваколатига кирадиган бўлса, унда Жамият Кузатув кенгаши ёки Ягона акциядори қарорлари лойиҳаси тайёрланиб, ваколатли бошқарув органи муҳокамасига киритилади.

17. Йиғилиш қарорига мувофиқ ўтказилган маблағнинг ўз вақтида тўланишини таъминлаш Жамиятнинг бош ҳисобчисига юклатилади.

## **IV. ЯКУНИЙ ҚОИДАЛАР**

18. Жамият томонидан кўрсатилаётган ҳомийлик ва ёки беғараз ёрдам кўрсатиш тўғрисидаги маълумотлар Жамиятнинг расмий веб-сайтида жойлаштирилади. Бундай маълумотларни жойлаштириш тижорат сирлари ва (ёки) махфий маълумотларнинг талабларига мувофиқ амалга оширилади.

19. Мазкур Низом ҳамда унга киритилган барча ўзгартириш ва қўшимчалар Жамият Ягона акциядори томонидан тасдиқланади.

20. Ўзбекистон Республикасининг қонунчилигига ўзгартиришлар киритилиши натижасида ушбу Низомнинг айрим бандлари билан зиддиятлар юзага келган тақдирда, мазкур бандлар Ягона акциядор томонидан тегишли ўзгартиришлар киритилгунга қадар ўз кучини йўқотади.